

ԿԱՄԱՎՈՐԱԿԱՆ ՇԱՐՓՄԱՆ ՄԱՍՆԱԿԻՑ ԿԱՐԱՊԵՏ ԹԱԴԵՎՈՍԻ ԹԱՐՓՈՇՅԱՆԻ ՀՈՒՇԵՐԸ*

Հայ կամավորական շարժման մասնակից, թալինաբնակ Կարապետ Թադևոսի Թարփոշյանի հուշերը տեղեկություններ են հաղորդում ոչ միայն մարտական գործողությունների, այլև հայ գյուղացու առօրյայի, նրա աշխատանքային գործունեության վերաբերյալ:

Հուշագիրը ծանր մանկություն է ունեցել. 1898 թ. մահանում են մայրն ու երկու եղբայրները, և Կ. Թարփոշյանը հարկադրված է եղել փոքր հասակից աշխատել տարբեր ասպարեզներում՝ հոտաղից մինչև ծառա: 23 տարեկանում անդամագրվել է Դրաստամատ Կանայանի II կամավորական խմբում, որի կազմում 1914–1916 թթ. մասնակցել է Կովկասյան ռազմաճակատում տեղի ունեցած մարտական տարբեր գործողություններին:

Հուշերում Կ. Թարփոշյանը հիշատակում է ժամանակի ազգային-ազատագրական գործիչներին և կամավորական խմբերի հրամանատարներին՝ Անդրանիկին, Նժդեհին, Խեչոյին, Դավիթ Բեկարին, Թ. Նազարբեկյանին և այլոց: Մարտերի ընթացքում երկու անգամ վիրավորվել է: Ռուսական հրամանատարությունից կողմից նա պարգևատրվել է Գեորգիևյան IV աստիճանի խաչով ու մեդալով: Ապաքինվելուց հետո կրկին մեկնել է ռազմաճակատ, որտեղ մարտնչել է մինչև 1916 թ.: Թարփոշյանն ականատես է եղել թուրք-քրդական վայրագություններին՝ արևմտահայության ցեղասպանության բազմաթիվ դեպքերի: Հայաստանի առաջին Հանրապետության հռչակումից հետո շարունակել է ծառայությունը բանակում, իսկ 1920 թ. մասնակցել է բոլշևիկյան մայիսյան խռովությանը: Խորհրդային կարգերի հաստատումից հետո ծառայել է Կարմիր բանակում, 1921 թ. բոլշևիկյան 11-րդ բանակի զորամասերի հետ մասնակցել Վրաստանի խորհրդայնացմանը, ապա՝ Լեռնահայաստանի դեմ մղված մարտերին: Մինչև 1922 թ. ծառայել է Հայկական I հեծյալ գնդում, իսկ զորացրվելուց հետո՝ 1922 թ. միլիցիայում, ապա՝ Լենինականի (Գյումրի) մաքսատանը և այլ աշխատավայրերում: Կ. Թարփոշյանի կենսագրության վերաբերյալ հետագա տեղեկությունները, ցավոք, բացակայում են:

Հրապարակվող փաստաթուղթը բաղկացած է ձեռագիր և մեքենագիր 17 թերթից: Թերթ 1–7-ը մեքենագիր են, իսկ 8–17-ը՝ ձեռագիր: Ձեռագիրն անթվակիր է, իսկ մեքենագիրը թվագրված է՝ 25. IX. 1963 թ.: Մեքենագիր հատվածում, որը տրված է շեղատառով, լրացրել ենք ձեռագրում չնշված, բաց թողնված տեղեկությունները՝ պահպանելով ժամանակագրությունը: Հուշերը հրապարակվում են բնագրին հարազատ առանց ոճական ու լեզվական էական փոփոխությունների կատարելով միայն ուղղագրական և կետադրական որոշ շտկումներ: Ուղղահայաց փակագծերով կատարել ենք անհրաժեշտ հավելումներ:

* Ներկայացվել է 09. IX. 2024 թ., ընդունվել է տպագրության 27. III. 2025 թ.:

Փաստաթուղթը պահվում է Հայաստանի ազգային արխիվի «Փաստաթղթերի հավաքածու հայ ազատագրական շարժումների վերաբերյալ» ֆոնդում (ֆ. 402):

ՌՈՒՔԵՆ ՍԱՀԱԿՅԱՆ

ԿԱՐԱՊԵՏ ԹԱՐՓՈՇՅԱՆ ԹԱԴԵՎՈՍԻ ԿՅԱՆՔԸ

25 սեպտեմբերի 1963 թ.
[ք. Թալին]

Ես ծնվել եմ 1891 թ. Թալինի շրջանի Աղյաման¹ (այժմ Գառնահովիտ) գյուղում, չքավոր գյուղացու ընտանիքում: Մայրս՝ Սոֆյա Կարապետի Թարփոշյան: Հայրս՝ Թադևոս Վարդանի Թարփոշյան: Ընտանիքի անդրանիկ որդին ես եմ, և [ունեցել եմ] 2 եղբայր: Կրտսեր եղբայրս Աղասին է, և փոքրը՝ Հարությունը:

1898 թվականը աղետի տարի եղավ մեր ընտանիքի համար. մահացավ մայրս և նրա հետ 2 եղբայրներս հիվանդության պատճառով: Սակայն մենք չիմացանք, [թե] նրանց հիվանդությունը ինչ էր: Տանը մնացինք ես ու հայրս 2 հորեղբայրներիս հետ: Մեկը ամուսնացած էր, իսկ մյուսը՝ ամուրի: Հայրս և հորեղբայրներս զբաղվում էին հողագործությամբ, իսկ մենք հորեղբորս կինը տանը զբաղվում էր տնտեսության հոգսերով, իսկ ես՝ փոքրիկս, արածացնում էի մեր գառները և հորթերը:

Շուտով հայրս ամուսնացավ, և ես նորից ունեցա մայր, որը չնայած իմ մայրիկին նման չէր, բայց սիրում էր ինձ որպես գործունյա փոքրիկի և խնամում ու փայփայում էր:

10 տարեկան հասակում հայրս ինձ տվեց մեր գյուղի հարազատներից մեկի տանը՝ [որպես] հոտաղ, երբ մի օր Մաստարայի Ս[ուրբ] Նախավկայի ուխտն էր, ես, հորեղբորս կնոջ և հարևանների հարսերի հետ, փախել էի ուխտի, վերադարձի ժամանակ խազեյինիս² տղան հանդիմանեց, թէ՛ «Ի՞նչ է, դու հոտաղ ես, թե՞՞ աղա, դու անասունները գոմում ես թողնում, թափառում»: Իսկ ես առանց խոսքին պատասխանելու հաջորդ օրը՝ առավոտյան, անասունը տարա դաշտ, թողեցի այնտեղ ու մեկնեցի Ալեքսանդրապոլ (Լենինական):

Ալեքսանդրապոլում իմ ազգականներից մեկը՝ Համբարձումը, ինձ ուղեկցեց³ Համուսենց Գևորգի տունը՝ [որպես] նոքար⁴: Ամաններն էի լվանում, պոչերը⁵ մաքրում, շուկա պրավիզի⁶ գնում և ամսական վաստակում էի 3–5 ռ[ուբլ]ի փող, որն ուղարկում էի տուն՝ հորս և մորս:

¹ Գտնվում է ՀՀ Արագածոտնի մարզում: 1946 թ. վերանվանվել է Գառնահովիտ:

² Տիրոջ:

³ Տեղավորեց ծառայության:

⁴ Ծառա:

⁵ Հատակ:

⁶ Պարեն, մթերք, պաշար:

2 տարի մնալուց հետո, որպես լավ աչքաբաց և ազնիվ ծառայողի, ինձ ուղարկեցին Ղարս իրենց աղջկա տունը ծառայությունից հեռացնելու և հարմարվելու համար: 2 տարի հետո տեղափոխվեցի Երևան, այնտեղ ծանոթացա մի տերտերի հետ, որը վերցրեց իր մոտ [որպես] տանը ծառայող: Անցավ ևս կյանքիս մեկ տարին: Այնուհետև ծառայեցի ավազանդրապոլցի փեշնիկ⁷ Հակոբի մոտ: Երկու տարի աշխատելուց հետո նորից տեղափոխվեցի Աթանեսովենց Սմբատի տունը ծառայելու, որտեղ մնացի նորից 2 տարի: Այսպես անցկացրի իմ կյանքի 23 տարին:

1914 թվին⁸ հայտարարվեց Համաշխարհային պատերազմը: Սկսեցին [սկսվեց] կամավորների մեկնումը պատերազմ⁹: Ես էլ [որպես] տաքարյուն երիտասարդ, [անդամ] գրվեցի կամավոր Իգդիրի [տեղակալված] Հայոց II խմբում¹⁰, որի ղեկավարն էր Սուրենը՝ Դրոն (Դրաստամատ): Մի քանի շաբաթ մարզվելուց հետո անցանք կովի: Մեր բանակի թիվը կազմում էր 500 հոգի: [Մեր] խմբապետն էր դավալվեցի Դավիթ բեկի տղա Նոսրուրը: Մյուս խմբապետներն էին՝ Դավի Դադարը¹¹, Յապոնը¹², Զեմլյակը¹³, Նեդեհը¹⁴, Քաչալ Դադարը¹⁵, Մարտիրոսը¹⁶ և ուրիշները:

⁷ Վառաճապետ:

⁸ Հուլիսի 19-ին (նոր տոմարով՝ օգոստոսի 1-ին):

⁹ Կովկասի իշխանությունը կամավորական ստորաբաժանումների կազմակերպման գործընթացը սկսում է 1914 թ. Հուլիսի 30-ին, երբ Կովկասյան բանակի հրամանատար, գեներալ Ն. Ն. Յուդենիչը հայտարարում է կամավորներ ընդունելու կայսր Նիկոլայ II-ի հրամանագրի մասին [տե՛ս «Кавказ» (Тифлис), 02. VIII. 1914]:

¹⁰ Հայ կամավորական ստորաբաժանումները հայտնի էին բանակ, գունդ և խումբ անուններով: Պաշտոնական գրադրությունում կոչվում էին գրուսինա:

¹¹ Միքայել Բադալբյուրյան (Դավի Դադար, 1886–1920) – ազատագրական շարժման գործիչ, ՀԶԴ անդամ, II խմբի վաչտի հրամանատար: Մասնակցել է Սարգաթապատի հերոսամարտին (1918 թ. մայիս):

¹² Հովհաննես Պարոնյան (Յապոն, 1878–1942) – ազատագրական շարժման գործիչ, ՀԶԴ անդամ: Մասնակցել է հայ-թաթարական կռիվներին (1905–1906 թթ.), Հայկական II վաչտի հրամանատար: Սյունիքի ինքնապաշտպանության (1919–1921 թթ.) և Փետրվարյան ապստամբության մասնակից (1921 թ.):

¹³ Հարություն Նանումյան (Զեմլյակ, ?–1918) – ազատագրական շարժման գործիչ, ՀԶԴ անդամ, Կամավորական II խմբի հեծելախմբի պետ: Պարզևատրվել է Գորգիսյան IV, III և II աստիճանի խաչերով: Զոհվել է 1918 թ. մայիսի 28-ին Բաշ-Ապարանի ճակատամարտում:

¹⁴ Գարեգին Տեր-Հարությունյան (Նեդեհ, 1886–1955) – ազատագրական շարժման, ռազմական և պետական ականավոր գործիչ, Առաջին Բալկանյան պատերազմի մասնակից, Հայկական վաչտի հրամանատար (25. IX. 1912 – 17. V. 1913), Կամավորական շարժման 1918 թ. մայիսին Ղարաբաղի (Վանաձորի) ճակատամարտի մասնակից, 1919–1921 թթ. Զանգեզուրի (Սյունիքի) պաշտպանության ղեկավար:

¹⁵ Քոչարյան Դադար (Քաչալ Դադար, 1874–1965) – ազատագրական շարժման գործիչ, ՀԶԴ անդամ, Գողթն գավառի և Լեռնահայաստանի գոյամարտի մասնակից (1919–1920):

¹⁶ Մարտիրոս Աբրահամյան (Բաղդադեցի Մարտիրոս, 1885–1957) – ազատագրական շարժման գործիչ, ՀԶԴ անդամ, Հայ-թաթարական կռիվների մասնակից, Հայկական II խմբի վաչտի հրամանատար (1914–1916), Բաշ-Ապարանի ճակատամարտի

Սկսվեց մեր շարժումը դեպի առաջ՝ թուրքերի դեմ, անցանք Արծալի գյուղը, այնտեղից՝ Ղզլղիզա, արյունալի մարտերով, որտեղից մեր ճանապարհը բաժանվեց դեպի Վանա գիծը: Երբ անցանք գիշերով Գյավրեշամեն¹⁷, արդեն ձյունը մեկ մետրի չափ դրել էր: Մեզ հետ էին կազակները, որոնք հետ մնացին: Գիշերով Գյավրեշամենում մեր վաշտը անցավ հարձակման աջ թևով Թադևոս քով¹⁸ բերանը, իսկ Դալի Ղազարինը ձախ թևը, Քաչալ Ղազարի վաշտը գյուղի չորս կողմը ցրվեց, և դիրքեր բռնեցին մնացած 2 վաշտերը: Հեծելագորային էին Յապոնն ու Ջեմլյակը¹⁹, որոնք [ուղղվեցին] Վանա ճանապարհի վերին մաս:

Լուսածագին, երբ ես պոստի²⁰ էի, 2 քուրդ եկան մեր կողմը, ձերբակալեցինք նրանց և լուր հասցրինք Դրոյին: Պատասխանը եղավ «Ոչնչացնել, ներս չթողնել»»: Հրամանը կատարված էր:

Հերթափոխության ժամանակ նախաճաշում էինք, իսկ հերթապահում էին 2 հոգի միայն: Սկսվեց քրդերի հարձակումը գյուղի վրա, իսկ գյուղի բնակիչները լրիվ փախել էին, սարեր բարձրացել: Դրոն հրամայեց հարձակման անցնել. մինչև երեկո կոփվր շարունակվում էր: Երեկոյան նրանց [քրդերին] լրացնելու եկան 3 [համիդեական] ալայի²¹ զորք, որոնց ղեկավարներն էին Քոռ Հասան փաշեն [փաշայի] ալայը և Մամեդե Լակզիի ալայը: Ղազարի զորքի գնդակներից սպանվեց Մամեդե Լակզիին: Նրա [Մամեդե Լակզիի] վաշտը ուզեց չրճանցման անցնել և ջախջախել Յապոնի ու Մարտիրոսի վաշտ[եր]ը, բայց տեղում տեղը ջախջախվեցին խոսրովի և Ղազարի վաշտ[եր]ի կողմից: Այստեղ վիրավորվեց Դրոն²²: Սպանվածներ չեղան, իսկ վիրավորները շատ քիչ էին: Դրոն նամակ գրեց կազակներին օգնական ուժ ուղարկելու, բայց չհասավ այդ օգնությունը՝ պատճառաբանելով, որ հրաման չունեն առաջ շարժվելու:

Գիշերը, երբ թուրքը համարվեց, մենք [հարկադրված] հետ նահանջեցինք դեպի Ղզլղիզա: Դրոյին և մնացած վիրավորները ուղարկվեցին Իգդիր, իսկ նրա տեղը մնաց ինչոն²³: Մեզ տարան Ալաշկերտի ուղղությամբ: Գիշերելով Ուչքիլիսայի²⁴ վանքում՝ առավոտյան շարժվեցինք Մանգասար, այնտեղից էլ՝ Լաբաբիլիսա: 2 օր այնտեղ հանգստանալուց հետո շարժվեցինք Ջլկան, որտեղից

1918, մայիս), թուրք-հայկական պատերազմի (1920 թ.), Փետրվարյան ապստամբության և Այդուբի ինքնապաշտպանության մասնակից (1921 թ.):

¹⁷ Գյավրի Շամեն:

¹⁸ Քոռ՝ քարակույտ, քարաժայռ:

¹⁹ Նկատի ունի երկու հրամանատարների հեծյալ խմբերը:

²⁰ Ժամապահ:

²¹ Գուլդ:

²² Դրոն վիրավորվում է 1914 թ. հոկտեմբերի 30-ին: Ռուս սպա, կազակ Ֆ. Ելիսեևը գրում է. «Այդ ժամանակ վիրավորվեց Դրոն, որը համարվում էր բոլորից քաջը: Մենք նրան պատվով ուղարկեցինք Իգդիր՝ ապաքինվելու» (տե՛ս Փ. Ի. Ելիսեև. Казаки на Кавказском фронте 1914–1917. Записки полковника Кубанского казачьего войска в тринадцати брошюрах-тетрадах. М., 2001, с. 85):

²³ Խաչատուր Ամիրյան-Գևորգյան (Դաշնակցական ինչոն, ինչոն, 1872–1915) – ազատագրական շարժման գործիչ, ՀՅԴ անդամ, մասնակցել է կամավորական շարժմանը, 1915 թ. ապրիլի 1-ից Արարատյան գնդի հրամանատարի օգնական (տեղակալ), առաջապահ-հետախուզական հեծելավաշտի հրամանատար, որն առաջինն է Վան մտել:

²⁴ Սբ. Հովհաննես:

Հարձակվեցինք Ղլիճ Գետուկ²⁵, անցանք դեպի Դերիկ գյուղը, այնտեղ էլ գիշերեցինք:

Մեր շարժման 5-րդ օրը մարտերով առաջ գնացինք Կունդին գյուղը, այստեղ [բնակավայրը] գրավելուց հետո բարձրացանք սարերը, սպանվեցին մեզանից մի քանիսը, իսկ ես վիրավորվեցի ձախ ուսիս գլխից, վերքը անմիաձայն էր. մի տեղ էր ծակված²⁶: Հաջորդ օրը վերքս կապած նորից Հարձակման էինք անցնում: Մի քանի օր հետո նահանջեցինք Ալաշկերտից մինչև Իգդիր²⁷, որտեղից մեզ բերեցին Քանաքեռ: Մի քանի օր հանգստանալուց հետո մեր խումբը ավելացավ²⁸: Մանևրայի²⁹ ժամանակ աշակերտները գնում էին տուն երևանից: [Զորախաղի ժամանակ] ես հագնվեցի [զգեսափոխվեցի հագնելով] աշակերտներից մեկի շորերը³⁰ և հետախուզեցի դիմացի գորքին, իմանալով տեղը՝ Հարձակվեցինք, իսկ նրանք հանձնվեցին: Իմ խիզախության համար Դրոն պարգևատրեց զրամով, և գովասանքով էին խոսում իմ հետախուզության մասին:

Մի քանի օրից հետո շարժվեցինք դեպի Էջմիածին³¹, ինձ տրվեց հետախույզ կամանդ³² Խոսրովի վաշտը. դարձանք հետիոտնից հետախույզ կամանդ, որտեղ պատվով ծառայեցի ես հայրենիքի պաշտպանության համար³³:

Էջմիածնում մեզ դիմավորեցին ուրախ, սեղաններով, գյուղի³⁴ մոտ ճաշկերույթ տվեցին: Այնուհետև նորից շարժվեցինք դեպի Իգդիր. այսպիսով, լրացավ պատերազմական կյանքի մեկ տարին:

1915 թվականի գարնանը [Արարատյան գունդը] շարժվեցինք դեպի Գյավրեշամեյի լեռները, այնտեղից էլ՝ Բերկրիկալա³⁵ [տանող] դժվար անդնդախոր ճանապարհներով: Բերկրիկալայում թուրքերն ու քրդերը մեր աջ կողմն ու դիմացի կարմունջում [կամուրջում] դիրքավորվել էին: Մեր վաշտը, առաջինը լինելով, ստանում էինք հարված 2 կողմից, թույլ չէին տալիս կամուրջը անցնել:

²⁵ Խլիճ:

²⁶ Խմբի կորուստը կազմել է 12 սպանված և 18 վիրավոր (տե՛ս Նիւթեր Հ. Յ. Դաշնակցութեան պատմութեան համար. հ. ԺԱ, Պէյրութ-Յուսուպար, 2015, էջ 169):

²⁷ Սարիղամիշյան գործողությունից հետ հայ կամավորական խմբերը ուղարկվեցին Թիկունք՝ հանգստի և համալրման նպատակով:

²⁸ 1915 թ. ապրիլի 1-ին կազմավորվում է Արարատյան գունդը: Վարդանի (Սարգիս Մեհրաբյան) V գնդի մարտիկները լրացնում են II, III և IV խմբերի անձնակազմերը: Գունդը գործելու էր ուսական Բայազետի ջոկատի կազմում:

²⁹ Զորախաղերի:

³⁰ Այսինքն՝ ծպտվեց, քողարկվեց աշակերտական համազգեստով:

³¹ Վաղարշապատ:

³² Ստորաբաժանում:

³³ Ռուսական հրամանատարությունը բարձր է գնահատում հայ կամավորների և, հատկապես, II խմբի մարտական գործողությունները: Կովկասյան IV բանակային կորպուսի հրամանատար, գեներալ Պ. Ի. Օգանովսկին առաջարկում է հիմնել ոչ միայն պահեստազոր, «այլև հաստատել հայ սպաների դպրոց, ուր շտաբի սպաների ղեկավարություն տակ պատրաստվելու են մեր խմբերի համար սպաներ» (տե՛ս Նիւթեր Հ. Յ. Դաշնակցութեան պատմութեան համար. հ. ԺԱ, էջ 166):

³⁴ Նկատի ունի ունի Էջմիածնի լճակը:

³⁵ Բերկրիկալե, Բերկրի:

Իսկ մենք, «ուռն» կանչելով, կարմուշը [կամուրջը] գրոհեցինք և բարձրացանք լեռը՝ թողնելով սպանվածների և վիրավորների բավական թիվ:

Գրավեցինք Բերկրիկալա բերդը:

Խոսարովի հրամանով քոչվորների դեմը կտրելու, հետ դարձնելու համար դուրս եկանք ես ու իմ 4 ընկերները: Այստեղ թուրքական մի մարդ հրացանը դեմ արած կրծքիս ուզում էր խփել, իսկ ես ճարպկորեն խփեցի իրեն, ձիուն և վերցրեցի հրացանը ու իր հրացանով իրեն սպանեցի, և մնացածներն էլ հնազանդորեն [առանց որևէ դիմադրության] հետ դարձան: Մենք նորից գրավեցինք մեր դիրքերը: Վանա ծովի Ալջավազի³⁶ մյուս կողմից սկսեցինք հարձակումը, իսկ Համազասպի³⁷ խումբը օգնության հասավ մեզ աջ կողմից ծովի կողքով, [և] թուրքերին միացյալ ուժերով հետ շարտեցինք: Մեզանից 5 հոգուց մեկը խփվեց, իսկ մնացած չորսիս Խոսարովը հետ բերեց Բեկի քյոչկեն³⁸: Քեռու խումբը հաջորդ օրը Պարսկաստանից եկավ³⁹, միացավ մեզ, շարժվեցինք դեպի Վան: Տիրամոր վանքում մենք տեսանք մարդկանց դիակների կույտեր այլանդակված: Հետախուզության ժամանակ իմ աչքերի առաջ [առջև] երևում էր [էին] հայ մայրեր՝ երեխաները կրծքներին խփած, այլանդակված մարդիկ, ոմանց ստինքներն էր կտրված, ոմանց՝ քիթն ու ականջները, ոմանց՝ ձեռքն ու ոտը և այլ այլանդակություններ, որը կատարել էր թուրքի բաշիբոզուկները: Տները նման էին ավերակների թալանված: Ես Խոսարովին ցույց տվի այդ բոլորը [ասելով], որ մեզ թույլ չեք տալիս նույնիսկ թուրքի սպանել, իսկ այս բարբարոսները ի՞նչ են արել՝ վարդապետին վառել էին, մի լավ էլ վզից կապած զցել էին եկեղեցու դռների վրա:

Իրիկնադեմին 8 հոգով գնացինք հետախուզության դեպի Խանասորի դաշտը: Մեզանից մեկը լավ էր իմանում քրդերեն խոսել, [իսկ] հակառակ կողմից 3 քուրդ եկել էին հետախուզության: Մեր քրդախոս ընկերը նրանց կանչեց՝ քուրդ ձևանալով: Նրանք եկան հանձնվելու, մեկն սպանվեց, մյուսը փախավ, մեկին բռնեցինք, բերինք տարանք [հանձնեցինք] Դոյի մոտը, իմացանք Վանի կողոպտվելու⁴⁰ մասին և ամեն ինչ, որից հետո սպանեցինք: Մեր սուրհանդակները եկան և պատմեցին քուրդ հետախույզի մասին, որը թուրք է քրդացած, հայի արյուն է խմում: Իրիկվան մենք հասանք Վան, որտեղ ոչ մի կրակ, ոչ մի ճրագ չէր երևում: Վանում կիսամահ եղած ժողովուրդը հոգեդարձ եղավ:

Ամեն մի տանը [տուն] մի գինավոր ուղարկեցին, ինձ էլ մի վարսավորի տուն ուղարկեցին: Լուսաբացին մենք պետք է դիմավորեինք Վանի ժողովրդի հետ

³⁶ Արծկե:

³⁷ Գարեգին Սրվաձադյանց (Համազասպ, 1873–1921) – ազգային ազատագրական շարժման գործիչ, ՀՅԴ անդամ, մասնակցել է հայ-թաթարական կռիվներին (1905–1906 թթ.), Հայկական III կամավորական խմբի հրամանատար, Բաքվի պաշտպանության մասնակից (1918 թ.): Դավադրաբար սպանվել է խորհրդային իշխանության կողմից (1921 թ.):

³⁸ Ապարանք, տաղավար:

³⁹ Պարսկաստանից եկել էր Անդրանիկի խումբը:

⁴⁰ Նկատի ունի 1915 թ. ապրիլի 7-ին սկսված Վանի Այգեստան ու Քաղաքամեջ թաղամասերի ինքնապաշտպանությունը: Թուրք-քրդական խառնամբոխը կողոպտել էր հայերի կողմից լքված տները:

Քեռուն և Համազասպին: 2 հերոսներ, որոնք սպանվել էին, հանդիսավոր թաղում կատարվեց [թաղվեցին] Վանում: Վանի բնակիչները սրտաբաց, ծաղիկների փնջերով դիմավորեցին իրեն փրկարար Հայ զորքին:

Մենք Վանում մնացինք 4–5 օր, ապա լուր ստացվեց, որ Շատախն ու Մոկսը պաշարված են. պետք է Դրոյի բանակը Հասնի օգնությամբ: Մեր բանակը Հասնի Հայոց ձոր, մեր ռազմաբազայի կամանդը շարժվեց Գյորան դաշտ, իսկ Դ[ալի] Ղազարի վաշտը Փեսանդաշտով անցավ Մոկս: Մնացած հետևակային զորքը մնաց Վանում: Գյորան դաշտը վերցնելու ժամանակ հակառակորդը փախավ, իսկ գյուղերի [հայ] բնակիչներն էլ ջարդվել էին: Հաջորդ օրը գնացինք Շատախ⁴¹: Անցանք Սպիտակով Շատախ: Շատախցիները ուրախ դիմավորեցին մեզ. տեղի քուրդ զորքերը փախել էին: 20 օր Շատախում մնացինք: Մեր բանակը Անդրանիկի⁴² հետ անցել էր Աղթամարով Սուրբի դիրքերը:

Սուրհանդակը հրաման բերեց, որ Անդրանիկը Դրոյին կանչում է իր մոտ, և մենք շարժվեցինք Մոկս, այստեղից էլ Փուլթի Սուրբ Գևորգ[ում] գիշերելուց հետո՝ Հաջորդ օրը, Հասնի Աղթամար⁴³: Այդտեղից էլ Խնձորիկի⁴⁴ վրա[յով] Քանա ձորի քերսը: Այստեղից [շարժվեցինք] Դատվան⁴⁵, 2 օր պատերազմից [մարտերից] հետո խլեցինք թուրքից դիրքերը: Նազարբեկովը⁴⁶ Վանա ծովի աջ կողմից հարձակում գործեց թուրքերի վրա:

Երեկոյան Անդրանիկը կարգադրեց, [որ] մեր զորքերը տեղավորվեն Դատվանի սարերի տակ: Մյուս օրը լուսադեմին, սկսվեց հարձակումը: Թուրքական զորքերը ջախջախվեցին:

Հարձակման ժամանակամիջոցին Անդրանիկը գտնվում էր ամենաառաջին շարքերում: Նազարբեկովն էլ իր հերթին սկսեց հարձակումը: Թուրքական բանակի մի մասը բնկավ չրջապատման մեջ և գլխովին ջախջախվեց: Այդ գիշեր հրամանատարները խորհրդակցություն ունեցան, որտեղ որոշել էին, [որ] Անդրանիկի, Դրոյի և Նազարբեկովի զորամասերը շարժվեն Մուշի վրա, ապա՝ դեպի Սասուն, որից հետո շարժվել դեպի Տիգրանակերտ, իսկ Քեռին, Համազասպը և ուսական բանակի գեներալ Չորնիզորովը⁴⁷ հետ պետք է շարժվեն Բիթլիսի⁴⁸

⁴¹ Գործողությունները կատարել է Հայկական II խումբը. 1915 թ. մայիսի 14-ին կամավորները հասել են Շատախ:

⁴² Անդրանիկ Օզանյան (1865–1927) – ազատագրական շարժման ականավոր գործիչ, հայդուկապետ, ռուսական բանակի գեներալ-մայոր, Սասունի ապստամբությունից հետո (1904 թ.), Հայկական I կամավորական խմբի (1914–1916 թթ.), երկրապահ գնդի հրամանատար (1917–1919 թթ.):

⁴³ Նկատի ունի Վանա լճի հարավային ափին գտնվող Ախավանքը: Այն Աղթամարի վանքի նավահանգիստն էր, որտեղ գտնվում էր Աղթամարի կաթողիկոսական վեհարանը:

⁴⁴ Խնձորգեն. գտնվում է Վանի նահանգի Կարճկանի գավառակում:

⁴⁵ Գտնվում է Բիթլիսի (Բաղեշի) գավառակում՝ Վանա լճի հարավարևմտյան եզրին:

⁴⁶ Թովմաս Նազարբեկյան (Նազարբեկով Ֆոմա, 1855–1931) – ռուսական բանակի գեներալ-մայոր, հայկական բանակի գեներալ-լեյտենանտ, Կովկասյան II հրաձգային բրիգադի, ապա դիվիզիայի պետ (1914–1916):

⁴⁷ Չեռնոզորով Ֆյոդոր Գրիգորի (1863–1919) – ռուսական բանակի գեներալ-լեյտենանտ, Կովկասյան 4-րդ կազակային դիվիզիայի հրամանատար (01.04–18.06.1915):

⁴⁸ Բաղեշ, որի գրավման համար ձևավորվել էր գեներալ Ի. Տրուխինի (1852–1922) համալսական ջոկատը, որի կազմում էին Հայկական I, II, III և IV կամավորական խմբերը:

վրա և ապա գնացին միանալու Տիգրանակերտի գծում: Հաջորդ օրը մի նոր հրաման ստացվեց զորքերի հետ նահանջի մասին. թե ի՞նչ պատճառով տեղի ունեցավ նահանջը, մեզ հայտնի չէր: Սկսվեց մի ահավոր նահանջ: Վանի և մյուս շրջանների ողջ հայ բնակչությունը նահանջեց: Մեր գունդը եկավ հասավ Երևան, իսկ Անդրանիկը Պարսկաստանով վերադարձավ⁴⁹: Նահանջի մասին պատմում էին, որ իբր թե հայկական դրոշակ⁵⁰ էին բարձրացրել Վանի բերդի վրա, որի մասին հաղորդել էին Նիկոլայ Նիկոլաևիչին⁵¹, և վերջինս էլ հայերին բնաջնջելու համար Հայաստանն առանց հայերի ահավոր ծրագիր էր իրագործում:

2 օրում հայի գյուղերը մաքրեցինք, և սկսվեց նորից նահանջը: Մի մասը՝ Քեոփն [ու] Համազասպը, Լիզի⁵² վրայով [նահանջեցին] Տիգրանակերտ⁵³, մյուսներն էլ՝ Մուշից Սասուն, Սասունից էլ՝ Տիգրանակերտ (Դրոն, Անդրանիկը և Նազարբեկովը [Նազարբեկյան]) այս տեղի է ունեցել ժողովի ժամանակ, իսկ ժողովից հետո հրաման եղավ, որ նահանջել⁵⁴: Նահանջում էին Ալջավազի կողմով: Հասան Բերկրիկայա: Այստեղ հեծելազորը թողին հետևապահ: Հետ նահանջելով հասանք Գյալրի Շամե: Ռուսաց զորքի հետ շարժվեցինք Բերկրիկայե և նոր հետ դարձանք Իգդիրով Երևան՝ Քանաքեռ: Հայրս եկած էր իմ հետևից, որ տուն դարձնե, իսկ ես, կամավոր լինելով, մերժեցի հորս:

1915 թ. օգոստոսին⁵⁵ Անդրանիկն իր կամավորական գնդով Վանից անցել էր Սորբի դիրքերը և պահանջել էր Դրոյից, որը գտնվում էր Շատախում, իր հեծելազորն ուղարկել իր տրամադրություն տակ: Երբ հեռագիրն ստացանք, մեր վաշտի հրամանատար Խոսրովը (Դավալվեցի Դավիթ բեկի տղան) կարգադրեց մեկնել Սորբի դիրքերը, որտեղ գտնվում էր Անդրանիկի զորամասը: Հեծելազորի

Սակայն 1915 թ. հուլիսյան նահանջը հնարավորություն չտվեց իրականացնել Բաղեշի գրավումը:

⁴⁹ Պարսկաստանով վերադառնում են հայկական կամավորական III և IV խմբերը: Անդրանիկը նահանջում էր գեներալ Թ. Նազարբեկյանի ջոկատի հետ, որն ապահովում էր վասպուրականցիների նահանջի անվտանգությունը:

⁵⁰ ՀՅԴ-ի դրոշմը:

⁵¹ Ռոմանով Նիկոլայ Նիկոլաևիչ (Կրտսեր, 1856–1929) — ռուս պետական և ռազմական գործիչ, հեծելազորի գեներալ, ռուսական ցամաքային և ծովային ուժերի գերագույն գլխավոր հրամանատար (20. VII. 1914 – 23. VIII. 1915), Կովկասի փոխարքա, Կովկասյան բանակի գլխավոր հրամանատար (23. VIII. 1915 – III. 1917):

⁵² Գտնվում է Մուշի գավառի Ներքին Բուլանդլի շրջանում՝ Լիզ գետի ափին:

⁵³ Հայկական III և IV խմբերը, ծանր մարտեր մղելով, Վասպուրականից նահանջել են Հյուսիսային Պարսկաստան:

⁵⁴ 1915 թ. հուլիսի 13-ին Արծկեում գեներալ Թ. Նազարբեկյանը հրավիրում է իր ենթակա զորամասերի հրամանատարներին, այդ թվում՝ Հայկական I և II խմբի հրամանատարներ Անդրանիկին ու Դրոյին խորհրդակցության: Օրակարգում մեկ հարց էր արդյո՞ք զինվորները երկարատև արշավից ու մարտերից հետո կկարողանան կատարել գիշերային նահանջ: Թ. Նազարբեկյանը վկայում է. «Դրոն ինձ պատասխանեց, որ չնայած դժվար է, սակայն եթե անհրաժեշտ է, ապա իր մարդիկ կդիմանան: Անդրանիկը ոչինչ չպատասխանեց. նա նստած էր խիստ մռայլված և ուժեղ ընկճված: Մնացած պետերը նույնպես համաձայնեցին նահանջել» [տե՛ս Ռ. Ս ա հ ա կ յ ա ն. Թովմաս Նազարբեկյանի անտիպ հուշերը, Տետր 4. 1915 թ. հուլիսի 10-ից մինչև օգոստոսի 14-ը. — «Վէմ» (Երևան), 2019, թիվ 4, էջ 279]:

⁵⁵ Հավանաբար՝ հունիսի վերջ կամ հուլիսի սկիզբ:

մեջ նաև ես էի: Մեկնեցինք Մոկս, որից հետո գնացինք Փուլթկի սուրբ Գևորգ վանքը⁵⁶, ուր մի գիշեր մնացինք և ապա առավոտյան վաղ ելանք սարի գլուխը. ձյունն այնքան քարացել էր, որ ձիերի ոտքի տակ չէր կոտրվում:

Այստեղից գնացինք Աղթամար վանքը՝ ծովի եզրին (կար նաև ծովի մեջ): Ապա հասանք Սորբի դիրքերը և այնտեղ էլ առաջին անգամ տեսա Անդրանիկին, որը մեզ հետ առանձին խոսակցություն ունեցավ և ասաց. «Սիրելի՛ եղբայրներ, դուք՝ յուրաքանչյուրդ, մի Անդրանիկ եք, եթե հերոսաբար կռվեք մեր դարավոր թշնամու դեմ: Մեր հայրենիքը ազատագրելու համար վաղը հարձակվելու ենք Խնձորիկի և Դատվանի վրա, դուք պետք է հերոսաբար կռվեք և ոչ մի երկյուղ չունենաք թշնամուց. նա մեր կամավորների և ուսուցիչների անունը լսելիս լեղապատառ փախչում է»:

Հարձակվեցինք ու գրավեցինք Խնձորիկը և հասանք Դատվանին: Վանա ծովի մյուս ափից՝ Ալջավազի [Արծկե] կողմից առաջանում էր [էին] գեներալ Նազարբեկովի զորքերը:

2 ամիս հանգստանալուց հետո նորից հարձակվեցինք Մանազկերտով դեպի Խնուս: Վերցնելով [գրավելով] Խնուսը՝ հարձակվեցինք Ղարախաչի վրա, անցանք չերքեզական գյուղը՝ Չարբորիս⁵⁷, այնտեղից էլ՝ Սուլուխ:

Վրա է հասնում 1916 թ.: Մեր խումբը նորից մեկնեց ճակատ: Մանազկերտի բերդով իջանք Խնուս, ուր մեծ ճակատամարտ տեղի ունեցավ: Այդտեղ ուսաների հետ միասին սվինամարտով վերցրինք նրանց ամրությունները: Ստացվեց լուր, որ էրզրումը վերցրած է⁵⁸:

Մենք մեկնեցինք դեպի Սուլուխի կամուրջը⁵⁹: Թուրքերը ոչ մի դիմադրություն չարեցին: Հաջորդ օրը ռազմադիպակները⁶⁰ հայտնեցին, որ Մուշը դատարկ է⁶¹: Մենք մի քանի օր գնացինք Մուշ և մի քանի օր մնացինք այնտեղ: Ապա արշավեցինք Մուսա բեկի ալայի վրա: Մուսա բեկը փախավ Խուլթ: Վերադարձանք Քրդագոմ⁶²: Այդ լեռներում շատ քրդի գյուղեր կային: Դրանց երիտասարդությունը ուղեցավ ճեղքել և անցնել Մուսա բեկի բանակը⁶³, բայց բոլորն էլ ջարդվեցին: Ձյունը բավական շատ էր, և հնարավորություն չկար առաջ շարժվելու:

Դրոյի բանակի մի մասը մնաց Մշո դաշտում, իսկ մեր՝ Դալի Ղազարի վաշտը գնաց Բիթլիսի ճանապարհը փակելու: Մնացինք շուրջ 10 օր. մթերքները ժամանակին չէր [չէին] հասնում, փոխադրական չկար, ձյան հսկայական շերտերի կույտեր կային: Ես և ընկերս՝ ուռուսը [ուռուսը]⁶⁴, գնացինք մի քրդի գյուղ՝ մթերք բերելու, բայց հաց չկար, միայն գլգիլ⁶⁵, ցորեն և դարի: Մեզ հետ

⁵⁶ Սորբում կար Սբ Գևորգ եկեղեցին: Բնակավայրից հյուսիս գտնվում էր Սորբի Ս. Կարապետի վանքը:

⁵⁷ Չարբոհ:

⁵⁸ Թուսները էրզրումը գրավել են 1916 թ. փետրվարի 3-ին:

⁵⁹ Գտնվում է Արածանիի վրա: Այն ունի 14 կամար:

⁶⁰ Հետախույզներ:

⁶¹ Մուշը գրավվել է 1916 թ. փետրվարի 3-ին:

⁶² Գտնվում է Մուշից մոտ 15 կմ արևելք՝ Մեղրագետի աջ ափին:

⁶³ Զոկատը կամ գուլդը:

⁶⁴ Հուշագիրը որևէ մանրամասներ չի հաղորդում հիշատակած անձի մասին:

⁶⁵ Կորեկի նման, բայց խոշոր հատերով հացաբույս:

վերցրինք մի հայ կին Սրսուռ [անուանով] (այժմ նա բնակվում է Սուլսզում՝ Ցամաքասար⁶⁶), որին քյուրդը տարել էր կնուլթյան, իմ ընկերս՝ ուռուսը վերցրեց իրեն կնուլթյան ու հետը բերեց: Այդ ժամանակ Անդրանիկը Վանա կողմից եկավ մեզ մոտ, [և] Դալի Ղազարի հետ միասին մի սենյակում բնակվեց: Նա հայտնեց, որ ինչ միջոցով էլ լինի, այս գիշեր մենք պետք է անպատճառ Բիթլիսը գրավենք⁶⁷: Կարգադրեց Ղազարին իր տղաներից 10 մարդ վերցնել ու առաջ շարժվել: Ես էլ այդ 10 տղաներից մեկն էի: Գիշերվա ժամը երկուսին Նազարբեկովի մի ասորիադի⁶⁸ հետ Անդրանիկը մտավ Բիթլիս: Անդրանիկը ծանոթ էր բոլոր դիրքերին, գործերի բոլոր կուտակումներին: Երբ մենք սկսեցինք ուժա-կոծել քնած գործերի դիրքերը, նրանք քնաթաթախ փախչում էին այս ու այն կողմ, երբեմն էլ՝ նույնիսկ, իրար վրա կրակում: Տեղի թուրք-քուրդ բնակչու-թյունը, գլուխը կորցրած, այս ու այն կողմ էր փախչում: Դրանցից շատերը կոտորվեցին, իսկ առավոտյան դադարեցվեց կոտորածը: Տեղի հայ ժողովրդին, բոլորին կոտորել էին, և ոչ ոքի չտեսանք քաղաքում: Հեռախոսագիր ստացվեց, որ Սև սարի ուղղովթյամբ եղած ոռա կողակներին թուրքերը շրջապատել ու կոտորել էին: Պատմում էին, որ կողակներին սպանել և ապա կողքերը ճեղքելով՝ գրպաններ էին բացել և նրանց ձեռքերը դրել էին մեջը ու կանգնեցրել էին պատերի կողքին:

Մեր խումբը մեկնեց Սև սար (Նեմրուլթ—Գրգուռ սարերի). կողքով մաքրեցինք քրդական գյուղերը, որպեսզի ճանապարհները վտանգի չենթարկվեին: Այսպիսով եկանք Ցրոնք: Ցրոնքում իմ ընկեր ուռուսը ցույց տվեց այն տունը, որտեղ հայերին ծեր ու մանուկ, հավաքել էին ու սպանել և ապա վառել էին: Նա ասաց, որ ինքն էլ դրանց մեջն էր եղել, բայց մի կերպ երդիկից դուրս էր եկել, փախել և ազատվել էր: Ցրոնքից վերադարձանք Մուշ: Մեզ ուղարկեցին Ղզլաղած գյուղ՝ պոստ պահելու: Այդ տեղից մոտ էր Կուրտիկ սարը: Երկու ամիս դիրքեր պահեցինք մինչև 1916 թ. ապրիլը: Ապրիլի 10-ին հարձակման գնացինք Արտիշեն, որը հիշվում է [նաև որպես] Գենջ, [որը] փոքր քաղաք է: Այնտեղ շրջ⁶⁹ էինք քաղում, ձավար էինք ճարել, որը խառնում ու ճաշ էինք պատրաստում ու դրանով կերակրվում: Փոխադրականը չէր հասնում: Ապա սկսեցինք հարձակվել Շենք⁷⁰, Սեմալ, Դըլլը⁷¹ գյուղերի վրա, որտեղ թուրքական զորքերը մեզ ուժեղ դիմադրություն էին ցույց տալիս: Մենք էլ, քչվոր լինելով, ետ դարձանք նորից Ղզլաղած: Այդ ժամանակ էլ լսեցինք, որ Քեոխ Ռեանդուզում սպանվել է⁷²: Դա մեզ համար մեծ սուգ էր:

1916 թ. ես անցա Դալի Ղազարի վաշտը, մեր կամանդան էլ անցավ հետևակայինի: Երբ հասանք Մուշ, բնակչությունը՝ հայ, թուրք, քուրդ, մնացել էին հպատակ:

⁶⁶ Գտնվում է ՀՀ Արագածոտնի մարզում:

⁶⁷ Բիթլիսը գրավվել է 1916 թ. փետրվարի 18-ի լույս 19-ի գիշերը:

⁶⁸ Զոկատի:

⁶⁹ Շուշանագիլների ընտանիքին պատկանող կոնդարմատավոր բույս, որը գործածվում է իբրև բանջար:

⁷⁰ Գտնվում է Մուշի գավառում՝ Կարմրակ վանքի մոտ:

⁷¹ Դըլլը. գտնվում է Մուշի գավառում:

⁷² Զոհվել է 1916 թ. մայիսի 15-ին:

Մեզ տարան ինչ գյուղը: Ձմեռ էր, որտեղից պատերազմեցինք քրդական Մուսա բեկի [նստավայր հանդիսացող բնակավայրի] վրա: Գյուղը քարուքանդ արինք, իսկ բնակիչների մի մասը, որոնք ազատվել էին, փախչել [փախել] էին [էր] ինձ: Մենք հաջորդ գյուղը՝ Գրդազում անցանք, այնտեղից էլ՝ Նեմրուժ և Գրգուռ սարը՝ Բիթլիսի ճանապարհի վրա: Մի շաբաթ դիրք պահելուց հետո Անդրանիկն ու Նազարբեկովը Վանի կողմից եկան, հասան: Մնացել էինք [էր] մեր վաշտը մենակ: Ես մի քանի տղաների և [Դավի] Ղազարի հետ անցանք Անդրանիկի մոտ: Գիշերը հարձակվեցինք և միևնույն⁷³ մեր վաշտի համար հաց վերցրինք ու եկանք հետ: 2–3 օր հետո մեզ հետ դարձրին այդ գյուղը, որտեղից էլ Սև սարով հարձակվեցինք քրդերի վրա Նազարբեկովի և Անդրանիկի հրամանով: Սև սարով անցանք Ցրոմա⁷⁴, այստեղ գիշերելուց հետո շարժվեցինք Մուշ, այստեղից էլ՝ Ղզլաղա⁷⁵ գյուղը: 2–3 ամիս դիրք պաշտպանելուց մինչև [1916 թ.] ապրիլի 15-ը, նրանից [որից] հետո սկսվեց ուժեղ ճակատամարտ թուրքերի հետ: Պատերազմելով անցանք Արդշու⁷⁶ և տեղեց կռիվը մինչև [ապրիլի] 23-ը և դադարեց, որտեղից նորից ետ եկանք Ղզլաղա: Այստեղից հարձակման անցանք նույն սարի Ողմա գեղուկի վրա Շենիկ-Սեմալի դիմաց:

[1916 թ.] ապրիլի 23-ին ուսս բանակի հետ միասին հարձակում գործեցինք Ղոզմա (Ողմա) գետուկի վրա, ուր թուրքաց զորքը մեծ ամրություն էր պատրաստել: Ես զվոդով [ղասակով] առաջ շարժվեցի, և դիրքերից մեկը վերցրինք: Սկսվեց ընդհանուր հարձակումը. թուրքը նահանջեց և գրավեցինք նրանց ամրությունները: Այդտեղ մենք ունեցանք մի քանի սպանված ու վիրավորներ: Մեր տղաներից մեկը՝ զարաբաղցի, ծանր վիրավորվեց: Ես վերցրի նրան ու բերեցի իմ խմբապետ Դավի Ղազարի մոտ: Վիրավորն ասաց, որ թող ինձ Թարփոշյանը տեղափոխի, բայց հրամանատարն ասաց, որ սա չի ապրելու, դու պատրոն [փամփուշտ] հասցրու գինվորներին:

1916 թ. ապրիլի 23-ին ես վիրավորվեցի այդ սարում: Ես ընկել էի մահամերձ վիճակում: Տղաները, կարծելով, որ ես մահացել եմ, թողնում ու փախչում են և հայտնում հրամանատարին իմ մահվան մասին: Բայց Դավի Ղազարը կարգադրում է գնալ և դիակը բերել, որպեսզի թուրքերի ձեռքը չանցնի: Երբ աչքերս բացեցի, տեսնեմ թուրքերը, վերևից «սալավաթ» («կեցցե» – Ռ. Ս.) տալով (գոռալով – Ռ. Ս.), առաջ են շարժվում, իսկ մեր տղաները սկսեցին հակահարձակումը: Թուրքերը փախան, մեր տղաներից Գուրգենը (Վերին Ախտեցի) ու պոլսեցի Իբիշ անունով մեր խմբից ինձ վերցրին ու բերին բժշկի մոտ: Բժիշկը բաքվեցի հայ էր: Նա ասաց, թե ի՞նչու եք սրան բերել, սա մեռնելու է: Ես, ուժերս հավաքելով, ասացի. «Բժիշկ, վերքս կապիր, ինձ բան չի լինի»: Վերքս ծանր էր և ինձ բերին Ղզլաղա: Սկսեցին բուժել, մի քանի օրից բերեցին Չարբոր: Այստեղ էլ մի քանի օր պահելուց ու բուժելուց հետո այստեղ եկավ Դրոն, ասաց, թե գինվորս ծանր վերք ունի, ֆայտոն⁷⁷ կուղարկեմ՝ նրան փոխադրելու համար: Մեկ շաբաթ հետո, մի քիչ թեթևանալուց հետո⁷⁸ ինձ տարան Մուշ, այնտեղից

⁷³ Այդպես է փաստաթղթում:

⁷⁴ Նկատի ունի Մուշից 15 կմ հյուսիս-արևելք գտնվող Ցրոնք գյուղը:

⁷⁵ Կզլաղա:

⁷⁶ Հավանաբար՝ Արտոնք. գտնվում է Մուշի գավառում:

⁷⁷ Կառք:

⁷⁸ Փոքր ինչ կազդուրվելուց հետո:

էլ խնուս – Ալաշկերտ⁷⁹ – Իգդիր: Իգդիրում ավելի ծանրացավ վիճակս՝ ձախ կողմից թիակի վրայից անցել էր գնդակը, դուրս եկել կրծքովս՝ սրտից քիչ վերև:

Խնուսում ինձ պարգևատրեցին [Գեորգիեյան] խաչով ու [Գեորգիեյան] մեդալով, որ տվել էր Դրոն ու գեներալը⁸⁰: Ինձ տեղափոխեցին բուժվելու Թիֆլիս⁸¹: Մեկ ամիս հետո տեղափոխեցին Գորի: 2 ամիս մնալուց հետո քիչ լավացա, կամիսիայի գցեցին⁸² ու ինձ 3 ամսով արձակուրդ ուղարկեցին տուն:

Տանը մեկ ամիս մնալուց հետո ինձ նորից կանչեցին⁸³ բանակ՝ Երևանում, որտեղ միացա Դալի Ղազարի վաշտի [վաշտին] և անցանք Պարսկաստան՝ մինչև Շարաբխանա⁸⁴: [1917 թ. վերջին] ուսական բանակները հետ էին քաշվում, ամեն ինչ (նյութական – տեխնիկական) սարքերը թողնում էին տեղում: Այնտեղից էլ ֆուրգոններով⁸⁵ ու ձիերով գինամթերք բերինք Նախիջևանի և Երևանի մեջտեղում⁸⁶: Ճանապարհը փակ էր թուրքերի միջոցով⁸⁷:

Ապա վերակազմավորվելով՝ մեր խումբը [1918 թ. փետրվարին] ուղարկեցին Սարիղամիշի ֆրոնտ⁸⁸՝ Անդրանիկին օգնության: Մինչև մեր գնալ, հասնելը, Անդրանիկը արդեն թողել էր էրզրումը: Մենք իրար հանդիպեցինք Ղարայորդանի⁸⁹ մոտ:

Անդրանիկը Ղազարին ասաց, որ պետք է հետ դառնալ այնտեղ, որտեղ կան քաջ կռիվող հայեր, այնտեղ էլ կան դավաճաններ, եթե իմ հետևից որ գնդակ խփեն, ապա այսպիսի հայերի համար արժանի չի կռվել⁹⁰: Այստեղից նահանջեցինք, հասանք Լենինական: Այստեղ խմբերը ցրվեցին, ես եկա տուն: Հայրս և մայրս ինձ տեսնելով, շատ ուրախացան:

Մնացածներն էլ բաժանվեցին⁹¹ կազմեցին, ետ վերադարձա բաժանված և որպես [Գեորգիեյան] մեդալ ունեցողի ուղարկեցին Հասան Ղալե⁹² պենսիոնի⁹³ վրա հսկելու⁹⁴:

⁷⁹ Ղարաքիլիսա:

⁸⁰ Հավանաբար՝ Թ. Նազարբեկյանը:

⁸¹ Արամովների հիվանդանոց:

⁸² Բժշկական հանձնաժողովի քննության ուղարկեցին:

⁸³ Հրամայել էր Դալի Ղազարը:

⁸⁴ Շարաբխանա:

⁸⁵ Բեռնասայլ:

⁸⁶ Այսինքն՝ Երևանի ու Նախիջևանի միջև ընկած տարածքում: Վայրը նշված չէ:

⁸⁷ Ճանապարհն արգելափակել էին տեղի թուրքերը:

⁸⁸ Ռազմաճակատ:

⁸⁹ Կարաուրդան:

⁹⁰ Հուշերի մեքենագիր մասում հետևյալ կերպ է շարադրված. «Անդրանիկն ասաց. «Ղազար Նան, մի տեղ, որ ինձ վրա մերոնք հրացան արձակեն, էլ ի՞նչ ես սպասում, հետ դարձեք, գնանք: Սկսվեց գաղթը»»:

⁹¹ Գումարտակ:

⁹² Հասանկալա:

⁹³ Ռազմագերիների:

⁹⁴ Հուշերի ձեռագիր մասում ավելացված է. «Դրանից հետո իմացա, որ Անդրանիկը գնացել է Պարսկաստան, նրա առաջ թուրքերը կտրել էին ինձ քաղաքի մոտ: Տեղի էր ունեցել մեծ ճակատամարտ և նա հետ էր վերադարձել Նախիջևան»:

Մի քանի ժամանակ հետո՝ 1917 թ-ին, սկսվեց ուժեղացիան⁹⁵։ Սկսվեց մեր գործերի ցրվելը⁹⁶, քայքայվելն ու քոչելը։ 1920 թ.⁹⁷ մտա Պերվի կոննի պոլկը⁹⁸։ Մեր պոլկը 1920 թ. հանձնեցին բոլշևիկների տրամադրությամբ տակ Հոկտեմբերյան կայարանում։ Ես ծառայեցի պոլկում մինչև 1921 թիվը⁹⁹։

1921 թ-ին մենք Ներքին Ախտայում¹⁰⁰ էինք։ Այդ ժամանակ սկսվեց ուժեղացիան Վրաստանում¹⁰¹ և պայքար բոլշևիկների ու մենշևիկների միջև։ Մեզ ուղարկեցին Ռեդամալով¹⁰² Կիրովական¹⁰³, և հարձակում գործեցինք Դվալի սարից մինչև Գյաուգյաո՝ վրաց մենշևիկների դեմ։ Գյաուգյաուից շարժվեցինք կոկիմերով դեպի Մանգլիս, այդտեղից էլ Բելի թուփան¹⁰⁴, որտեղ մեզ հետ էին [էր] ուսական պերվի կոննի պոլկը։ Այս գյուղերով անցանք Կոջոուր¹⁰⁵, որտեղից էլ թիֆլիս¹⁰⁶։ Թիֆլիսում մի քանի օր մնալուց հետո հարձակում գործեցինք Գորիի վրա, այստեղ [որը] գրավելուց հետո մի 2 օր հետո շարժվեցինք Կաբելի¹⁰⁷, որտեղ մնացինք մեկ ամիս։ Վրաց մենշևիկները հանձնվեցին, և այսպես ազատագրեցինք Վրաստանը։

Մեկ ամիս հետո մենք վերադարձանք Զանգեզուր Նոդեհի ավանտյուրայի¹⁰⁸ դեմը, այնտեղ էլ ազատագրեցինք ...¹⁰⁹, Բռնակոթ, Անգեղակոթ, Դարբաս, Ղարաքիլիսի գյուղերը։ Այստեղ մի քանի ամիս [մնալուց] հետո նորից եկանք Երևան։

1921 թ.¹¹⁰ Գրիգոր Ղազարյանը¹¹¹ ինձ, որպես մեծահասակի, ազատեց¹¹² պոլկից։ Վերադարձա գյուղ։ Այստեղ հարազատներին տեսնելուց հետո գնացի

⁹⁵ Հավանաբար՝ 1917 թ. փետրվարյան հեղափոխությունը։

⁹⁶ Դասալքությունը։

⁹⁷ Հուլիսի կողմից ջնջվել է հետևյալ նախադասությունը. «Հարձակում գործեցինք Վրաստանի [վրա]»։ Նկատի ունի 1918 թ. վերջի հայ-վրացական պատերազմը։

⁹⁸ Առաջին հեծյալ գունդը։

⁹⁹ 1922 թ.։

¹⁰⁰ Այժմ՝ Հրազդան։

¹⁰¹ Տեղի է ունեցել 1921 թ. փետրվարի 11-ի լույս 12-ի գիշերը։

¹⁰² Այժմ՝ Զրառատ։

¹⁰³ Մեծ Ղարաքիլիսա, այժմ՝ Վանաձոր։

¹⁰⁴ Հավանաբար՝ Բելի Կլյուչ։ Այժմ՝ Թեթրի Միլարո։

¹⁰⁵ Կոզոուր։

¹⁰⁶ 11-րդ կարմիր բանակի զորամասերը թիֆլիս են մտել 1921 թ. փետրվարի 25-ին։

¹⁰⁷ Հավանաբար՝ Կոբուլեթի։

¹⁰⁸ Արկածախնդրություն։ Հուլիսից օգոստոսին է «ավանտյուրա» եզրույթը, որով պիտակում էին խորհրդային տարիներին Գ. Նոդեհի գլխավորած Սյունիքի ազատագրական շարժումը։

¹⁰⁹ Ընթեռնելի է։

¹¹⁰ 1922 թ.։

¹¹¹ Անձի ինքնությունը չհաջողվեց պարզել։

¹¹² Զորացրեց։

Երևան և 1922 թ-ի ապրիլի 1-ից աշխատեցի [որպես] կրտսեր միլիցիոներ¹¹³: Մի տարի ծառայելուց հետո գնացի Լենինական ու ծառայեցի դամոժնում¹¹⁴ 2–3 տարի: Հետո Լենինականից տեղափոխվեցի նորից գյուղ: 1932 թ. ընդունվեցի կոլխոզ¹¹⁵: Մինչև 1944 թ. գյուղում եմ աշխատել, իսկ [19]44 թ-ից հետո Ալաբյազի ջրային տնտեսությունում եմ աշխատել թունելի բացմանը մինչև 5 տարի ...¹¹⁶ եկչիկ: Ընտանիքս տեղափոխել եմ Արագած և բնակվում եմ [19]53 թ-ից Արագածի այգեգործական սովխոզում¹¹⁷:

ՀԱԱ, ֆ. 402, ց. 2, գ. 15, թ. 1–17: Բնագիր: Մեքենագիր-ինքնագիր:

¹¹³ Միլիցիայի շարքային անձնակազմի համար 1917 թ. փետրվարյան հեղափոխությունից հետո սահմանվել էր երկու կոչում՝ կրտսեր և ավագ:

¹¹⁴ Մաքսատուն:

¹¹⁵ Կոլեկտիվ տնտեսություն:

¹¹⁶ Ընթեռնելի չէ:

¹¹⁷ Խորհրդային տնտեսությունում: